

Uunga siunnersuut: Eqquiniaasitsinermi akitsuutit pillugit Inatsisartut inatsisaanni § 1, imm. 4-p allangortinnissaanut taamaalilluni eqquiniaasitsinermi bingortitsinermilu (peqatigiiffinnit ingerlanneqartunit) eqqukkat eqquiniaasitsinermi akitsuutip akilerneqartannginnissaanut siunnersuummik saqqummiussinissaannik Naalakkersuisut peqquneqarnissaannut Inatsisartut aalajangiiffigisassaattut siunnersuut. Akitsuuteqartitsinnginnissamut aningaasanik ikisilluni pinnguaatinit eqqukkat akitsuutaat ilaatinneqassanngillat.

(Inatsisartunut ilaasortaq Jens Immanuelson, Siumut)

Akissuteqaat

Aningaasaqarnermut, Aatsitassanut, Nunanullu Allanut Naalakkersuisoq

1. Siullermeerneqarnera

Eqquiniaasitsinermi bingortitsinermilu peqatigiiffinnit ingerlanneqartunit eqqukkat eqquiniaasitsinermi akitsuutip akilerneqartannginnissaanut siunnersuummik saqqummiussinissaannik Naalakkersuisut peqquneqarnissaannut Inatsisartut aalajangiiffigisassaattut siunnersuuteqasasut Inatsisartuni ilaasortaq Jens Immanuelson siunnersuuteqarpoq.

Eqquiniaasitsinermi eqqukkat tassunga ilaallutik lotteri aamma bingo aningaasarsianit akileraarutit pillugit inatsimmi § 13 naapertorlugu aallaavittut inuit ataasiakkaat isertitarisaattut akileraaruserneqartussaattitaapput.

Eqquiniaasitsinermi akileraarutit pillugit Inatsisartut inatsisaat malittarisassamut pingaarnermut ilaangitsunik imaqarpoq tassa aalajangersarneqarmat Kalaallit Nunaanni eqquiniaasitsinermi taamaallaat eqqukkat ilaasa 200 kr.-nit amerlanerussutaasa 15 procentii akitsuutinut akiliutigineqartassasut. Akileraarnermut aqutsisoqarfimmut akileraarutissanik unerartitsillunilu akiliuteqartoqartarnissaa eqquiniaasitsisup ullumikkut pisussaaffigaa.

Eqquiniaasitsinermi akileraarutit atorunnaarsinneqarnissaat pillugu siunnersuuteqartup siunnersuutaa Naalakkersuisut itigartissinnaanngilaat peqatigiiffiit eqquiniaasitsinerannut atatilugu eqqukkat tunniunneqartartut peqatigiiffiup aningaasaqarneranut suliniarneranullu ilu-aqutaasumik sunniuteqarsinnaammata.

Taamaattorli Naalakkersuisut naliliipput atorunnaarsitsineq peqatigiiffinnut eqquiniaasitsinermi eqquisunut eqqukkamik tunniunneqartunut akitsuutinik unerartitsinngitsunut peqatigiiffiulli sinneqartoorutaannit akitsuutinik akiliuteqarnissamik toqqaasimasunut taamaallaat pingaaruteqartoq - tamatumalumi kingunerisaanik peqatigiiffiup eqquiniaasitsinerani isertitat ikilissammata.

Eqquiniaasitsinermik ingerlatsinermi akileraaruteqartarneq appasereerpoq. Taamaalilluni akileraartarnermut inatsimmi malittarisassat nalinginnaasut naapertorlugit eqqukkat isertitatut akileraarusigassatut suliarineqarpata akitsuutit akileraartarnermut eqquisup akiliutissai naleqqutissanngillat.

Akitsuutip apparteqqinneratigut imaluunniit atorunnaarsinneqarneratigut akileraartarnermi malittarisassanik sanioqutsiniarsarinernik annertusititsiinnarani - atorunnaarsitsineq taamatuttaaq nunatta karsianut isertussanik annikillisisusaaavoq. Isertitat taakku allatigut isertitaqarnikkut imaluunniit arlaatigut sipaaruteqarnikkut - nassariniarneqassapput. Taamaattumik akitsuutikillisaanikkut peqatigiiffinnik nukittorsaanissamik pisariaqartitsineq pisariaqartitanut aamma susassaqarfiit allat iluanni suliniutinut atatillugu eqqarsaatigilluarta-riaqarpoq.

Naalackersuisut isumaqarput Jens Immanuelsenip siunnersuutaa naleqquttoq maluginiarneqarlunili akitsuuteqartitsinnginnerup ajornartorsiutinik eqqarsaatigilluaqqissaartarialinnik nassataqarsinnaanera. Tamatumunnga atatillugu Naalackersuisut isumaqarluinnarput akitsuutikillisaasoqassappat tamanna iluaqutaassasoq - peqatigiiffinnut ataasiakkaanuinaanngitsoq - aammali inuiaqatigiit ataatsimut isigalugit.

Taamatut oqaaseqarlutik Naalackersuisut inassutigaat siunnersuut akuersissutigineqassanngitsoq.